



de d'âto: O Pâxo de Tórbi.
 in mêzo: O grùppo statoâio in
 sciâ lêza co-i Prioi de
 Tórbi davanti a l'artâ.
 de sôtta: l'arîvo da procesción a-
 a Capélla.

pélla pe sarvâla da-o degrassdo. Da alôa, lô organizân 'na fêsta tùtti-i ànni, o doî de zùgno. Pàrtan a pê da-o bivio pe Cà de Brùzzi, vixin a-o Pâxo de Tórbi, e vàn in procesción derê a'n Cristo picin, portòu da unn-a de confratèrnite da valâdda do Porçéivìa. In sciô pròu vixin a-a capélla, o pàrego de Tórbi o díxe a méssa e dòppo, chi veu, o peu mangiâ o menestrón di segagin e âtre cöse.

Sórvia a capélla, da-o 2006, gh'è in canpanin picin, a véia, e da-a canpànn-a pénde 'na còrda. A l'intrâta da capélla gh'è 'na târga co-i vèrsci do Peo Bozzo (1) che mi chi scrîvo còmmè da-o tèsto originâle:

***Campann-a che ti sèunni in mêzo a-o verde
 co-a voxe secolare e tanto câa;
 in questa paxe l'anima a se perde
 e i tò reciocchi invîtan a pregâ.***

Drénto a-a capélla, inte 'na niccìa, gh'è 'n grùppo statoâio ch'o raprezènta a primma apaiçion da Madònna a-o Benéito Pài.

Mi sòn aprèuo a fâ de riçèrche in quèsta zòna chi, e 'n ançiàn de Vacâisa de d'âto, o Peo Bruzun, clâsse 1930, o m'â contòu a stòia de primme dôe stâtoe che sòn stæte li, stòia che lê o l'âiva sentîo da seu poæ Milio. A primma stâtoa a l'êa de brónzo e l'â distrûta cón dôe scciupetæ 'n caciòu de Mórta ch'o l'êa aragiòu pe no avéi amasòu di òxélli. Quànde o caciòu, tornàndo a câza, o l'è arivòu a Scarpin nèuvo (Fòssa Loêa) o l'êa coscì pentîo de quéllo ch'o l'âiva fæto che, pe métise a coscènsa a pòsto, o l'â decîzo de fâ in zenógge tùtta a strâdda che gh'è restâva pe anâ a cà. Mì, ancheu, caminàndo spedîo, ghe métto ciù de 'n'òa. A segónda stâtoa, ch'a l'êa de màrmo, a l'è stæta distrûta ascì, a bacæ.

Bén bén de cöse ghe saiéivan ancón da dí in sciâ Capélla do Gàrso. L'ùrtima che ve cònto a rigoàrda a gita che o Comitâto de Tórbi o l'organizza a néutte do dêxe d'agòsto pe anâ a-o Gàrso e a Ròcca Mãia a védde e lâgrime de sàn Loénso... se no cèuve.

(1) Vèrsci da cansón "Ave Maria zeneize", muxicâ da-o Gustin Dòdê. A-a fin da méssa do 2011, o méistro Damian Profummo o l'â cantâ aconpagnàndose co-a tastæa.

